

listovi...



Listovi

gračaničkog kalendara

(od 25. juna do 30. oktobra 1996. godine)

Priredio: Hasan Čalić

25. maj

Novoustanovljen Dan općine Gračanica - u ozračju mira

Dan općine Gračanica, 25. maj, koji se, nakon njegovog ustanovljenja, ove godine obilježava prvi puta, Gračanica je dočekala okupana i umivena, sa novim fasadama, urednim parkovima, dvorištima i baštama, okićena transparentima, sa još uvijek nezaraslim ratnim ranama, ali u ozračju mira i nade da nam dolaze bolji dani.

Uz podsjećanje na 25. maj 1992. godine, kada su borci Gračanice uspješno, iako skromno naoružani i opremljeni, odbili, po svim procjenama, najžešći napad ozrenskih četnika na Gračanicu, Dan općine obilježen je brojnim kulturno-zabavnim i sportskim manifestacijama. Posjećena su mezarja poginulih boraca kao i njihove porodice, promovisane su nove knjige ("Obrana Gračanice 25. 5. 1992" i prvi broj "Gračaničkog glasnika"), izvedena pozorišna predstava, organizovane izložbe slika i ratne fotografije u Domu kulture...

Uoči dana općine, 24. maja, u centru grada, pred oko deset hiljada Gračanlija, u pravoj svečarskoj atmosferi proglašeni su najbolji sportisti općine, a nastupili su i poznati izvođači narodne i zabavne muzike. Igralo se i pjevalo do kasno u noć...

Na sam Dan općine, održana je svečana sjednica općinskog vijeća kojom je predsjedavao Halid Hadžihanović, predsjedavajući Vijeća, a referat o 25. maju pročitao inženjer Hazim Vikalo, općinski načelnik, naglasivši da Gračanlije i svi žitelji općine mogu biti ponosni što su se odbranili, što nisu dozvolili da ni u jedno bošnjačko naselje na ovoj općini stane četnička čizma, što ovdje, uprkos mnogim

teškoćama, niko nije ostao nezbrinut i gladan, što su imali organizovanu civilnu vlast i što su, i pored ogromnih materijalnih i ljudskih žrtava, čitavo vrijeme rata imali Bosnu...

Na svečanoj sjednici zaslužnim pojedincima, vojničkim sastavima, organima i institucijama dodijeljena su najviša priznanja općine.

Općinska priznanja povodom 25. maja, Dana općine dobili su:

Zlatne plakete: Predsjedništvo općine Gračanica, Teritorijalna odbrana Gračanice, DD "Fering", Manevarska jedinica Patriotske lige Gračanica i Hazim Vikalo, ratni predsjednik i načelnik općine;

Srebrene plakete: Ratna bolnica Soko, RTV Gračanica, Manevarski vod policije, Osman Ahmedbegović, Ibrahim Nurkić, Meliha Hadžihasanović, Osman Puškar, Tarik Rešidbegović, Mjesna zajednica Lukavica i Faruk Širbegović;

Zlatne značke: Džemal Jukan, Ekrem Kamarić, Bahrija Džananović, Bahrija Mehurić, dr. Fadil Pitić i Sead Rešidbegović;

Srebrene značke: Tajib Omerdić, Faruk Huskanović Bilal Begović, Tajib Kamarić, Hamdija Mujačić, Irđin Kovačević, Rahman Spahić, dr. Abdulkadir Šišić;

Javne pismene pohvale: Elektrodistribucija Gračanica, Mjesna zajednica Gornja Orahovica, Mjesna zajednica Babići, Mjesna zajednica Soko, Udruženje Ratnih vojnih invalida, Merhamet, Crveni križ, Karitas, Komus, Mjesna zajednica Pribava, Dom zdravlja, Logistički centar, Besim Duraković, Abdulah Klokić, Galib Avdić, Sejdo Beganović, Mehmedalija Beganović, Crveni polumjesec, Safet Dedić, Sead Gazibegović, Ahmed Hadžiaganović, Mustafa Jahić, Nezir Kapetančić, Tajib Nurikić, Nijaz Omerović, Mjesna zajednica Miričina, Ahmed Spahić, Muhamed Šelo, Husein Šakić i Alija Zake-tović.



22. juni

Umro profesor Osman Delić - nastavnik mnogih nastavnika

Profesor Osman Delić, prvi, najvrijedniji i najstariji saradnik "Gračaničkog glasnika" preseli dok još prvi primjerci ovog Časopisa nisu bili ni dospjeli do svih svojih čitalaca. Plemenito srce našeg dragog rahmetlije prestalo je da kuca 22. 6. 1996. godine kad najljepše mirišu lipe u gračaničkoj čaršiji. Toga dana nekako su drugačije mirisale. Čaršija je ostala bez svog dobrog starog profesora.

Rođen je 1919. godine u selu Sibovcu, općina Gradačac, gdje je završio mekteb i osnovnu školu. Od 1932. do 1940. godine pohađao je i završio Gazi Husrvbegovu medresu u Sarajevu. Početkom drugog svjetskog rata bio je na dužnosti prefekta na medresi u Brčkom, a 1942. godine našao se u Gornjem Rahiću kao učitelj, a zatim slijedi domobranstvo, napokon mobilizacija u Handžar diviziju i sudbina slična mnogim Bošnjacima koji se na ovaj ili onaj način nadoše u toj jedinici.

Iako je iz rata jedva izvukao živu glavu, odmah mu je nametnuta hipoteka sumnjivog i nepouzdanog intelektualca Bošnjaka, koje se nije oslobodio gotovo do mirovine. Učiteljujući po mnogim mjestima u ovom dijelu Bosne od Crvice kod Srebrenice pa do Gračanice, gdje dolazi 1951. godine, Osmanefendija je tu hipoteku podnosio sa dostojanstvom i bez poze stradalnika, shvatajući da se samo predanim radom na opismenjavanju i prosvjeđivanju svog naroda na najbolji način odužuje tom narodu. Iako je nerado govorio o tome zašto nikada nije mogao biti, naprimjer, direktor škole, od te svoje prosvjetiteljske ideje vodilje nije odstupao do zadnjeg dana. Iako se i sam tokom svog napornog rada i službovanja školovao i stručno izgrađivao (završio je filozofski fakultet u Beogradu - odsjek orijentalistike i njemačkog jezika 1966. godine), uz generacije i generacije đaka, izveo je i brojne prosvjetare, učitelje i nastavnike, kojima je predano i istrajno prenosio svoja pedagoška znanja i iskustva. Uvijek je insistirao na tome da naša škola bude ne samo učionica, već i svojevrstan kulturno-civilizacijski centar u svakoj sredini. Pamtiće se još dugo smotre učeničkog znanja, stvaralaštva i kulture koje je organizovao i osmišljavao širom ove

općine.. Nije to radio radi sticanja nekakve svoje rukovodilačke karijere i vlastite promocije (kako su mnogi u to vrijeme radili), već iz uvjerenja da samo na taj način čini dobro i sebi i svome narodu.

Bio je tih i skroman čovjek, kojeg život nimalo nije mazio, bio je čovjek od razumijevanja i znanja, uporan kao krtica i vrijedan kao pčela.

Baveći se stručno-pedagoškim radom, godinama je, gotovo sa strašću, prikupljao materijal i istraživao pisanu građu iz kulturne povijesti Gračanice i njene okoline jer je Gračanicu volio kao i svoj rodni Gradačac. Nije bilo "hore" u onim vremenima da se to ozbiljnije podstiče, štampa i objavljuje. Ipak, 1986. godine uspio je napisati i objaviti knjigu "100 godina osnovnog školstva u Gračanici", javljao se sa svojim radovima u nekim zbornicima o školstvu u susjednim opštinama (Lukavac) i ponešto od toga objavljivao u lokalnim medijima. U prvom broju "Gračanickog glasnika" objavio je svoje istraživanje o kulturnim mjestima na području gračanické općine, istraživao je staru biblioteku Hadži Halil-efendije u Gračanici, a iza sebe je, pored bogate biblioteke, ostavio i nekoliko nedovršenih i neobjavljenih rukopisa iz kojih izdajamo rukopis o razvoju zdravstva u Gračanici i o razvoju organa lokalne vlasti za vrijeme Austro-Ugarske. Nadamo se, akobogda, da će neki od tih rukopisa ugledati svjetlo dana i na stranicama ovog časopisa koji je ostao, nažalost, zauvijek bez svog najvrijednijeg saradnika, a Gračanica, njegovi prijatelji i njegova porodica bez dobrog čovjeka i predanog poslanika.

24. juni

Otvoren kamenolom u Piskavici

Nakon izvršenih pripremnih radova, od kojih treba pomenuti novoizgrađeni put, hiljadu dužnih metara visokog napona, te nabavke postrojenja, u Piskavici, nedaleko od Gračanice, u okviru privatne firme "Metalpromex" počeo je sa radom kamenolom - prvi novi proizvodni pogon u poslijeratnoj Gračanici, vlasništvo inženjera Izeta Spahića iz Gračanice.

Skromnoj svečanosti, upriličenoj tim povodom, pored ostalih gostiju, prisustvovao je i ambasador Velike Britanije u Bosni i Hercegovini Brajan Hob-

kinson, čija je ambasada ovaj pogon donirala sa oko 40 hiljada njemačkih maraka.

Kamenolom je osposobljen da proizvodi sve sitnije granulacije kamena, odnosno građevinskog šljunka i pijeska, kao i još neke proizvode za građevinarstvo, prijeko potrebne u predstojećoj obnovi naše, ratom opustošene, zemlje.

Juni

Gračanička privreda "vratila se kući"

Krajem maja i početkom juna, nakon četiri duge godine rada na izmještenim lokacijama i u krajnje neuslovnim prostorima, većina gračanickih bivših društvenih i privatnih preduzeća vratila se u svoje proizvodne hale u industrijskoj zoni Gračanice, koja je tokom rata bila, takoreći, na prvoj borbenoj liniji. Valja napomenuti, međutim, da se "Jadrina" prva, još dok je mir bio daleko, vratila "svojoj kući", da "Graplast" nije u potpunosti ni napuštalo svoje proizvodne pogone pored Spreče, da su mašine u "Grinu" tokom rata stalno bile u pogonu, da se "Transport i mehanizacija" našla na svojoj lokaciji u "opasnoj zoni" još dok su fujukale granate...

Među prvima poslije Dejtona u svoj savremeni objekat vratilo se Distributivni centar, a potom "Fortuna" kao najmnogoljudniji radni kolektiv na ovoj općini. Vrativši se "na svoje", iako je i u toku rata stalno radila, istina sa malim kapacitetom, "Fortuna" je "od prave" krenula s poslom. Uposlila je 560 radnika, koji rade u jednoj smjeni i obezbijedila siguran posao do kraja ove godine. I "Fering" je "u svom i na svom" od početka juna ove godine. Poslije ratne namjenske proizvodnje, polahko, ali sigurno oživljava svoju mirnodopsku civilnu proizvodnu liniju koju je imao i prije rata. I u "Grafopaku" proizvodnja se lagano uhodava, plan je da se iz Hrvatske vrata mašine i upotpuni proizvodni pogon, "Graplast" je odavno preselio i "ostatak" radnika u svoje stare prostore.

Industrijska zona je, inače, načičkana malim fabrikama koje ovog ljeta niču kao gljive poslije kiše. "Arhitekt" je započeo proizvodnju betonskih konstrukcija, ustvari "fabriku za proizvodnju proizvodnih hala" na novoj lokaciji kod Grabovca, neposredno uz Spreču i krenuo u završetak, prije rata započetog, velikog zanatskog centra na Ha-

judarovcu, uposlivši preko 150 građevinaca, preduzeće "Sax" sagradilo je novu benzinsku pumpu pored magistralnog puta Doboj - Tuzla, izgrađeno je još nekoliko proizvodnih hala u kojima će uskoro zabrjavati mašine.

Valja, međutim, reći da ne ide sve baš glatko. Prvo se mora popraviti i sanirati ono što je oštećeno granatama, zaštititi od daljeg propadanja ono što je ostalo, pa onda ići dalje. Nedostaju sredstva za sanaciju, o obrtnom kapitalu da se i ne govori. Primjer "Olimpa", koji mora "naći" milion DM za sanaciju najbolje to ilustruje, građanički motel čeka sanatore i "propada", neko razvedranje se očekuje poslije izbora. Svi obećavaju da će "para" napokon "procuriti". Sve, uglavnom, još uvijek ostaje na obećanjima.

Vrativši se "svojoj kući" gračanička privreda je ipak napravila odlučujući korak ka vlastitoj revitalizaciji. Svi se nadaju da dolaze bolji dani.

8. juli

Požar u Stjepan Polju

U 17 sati na industrijskom objektu - farmi pilića Mahmuta Okića u Stjepan Polju buknuo je požar velikih razmjera koji je prijetio da zahvati i ostale njegove proizvodne objekte u neposrednoj blizini, postrojenja i velike količine gotovih proizvoda (lamperije i broskog poda).

Srećom, u veoma kratkom roku stigli su gračanički vatrogasci, okupio se i veliki broj Okićevih komšija, došli su i pripadnici policije iz Gračanice i radnici "Komusa", pa su zajednički požar uspješno lokalizovali.

17. juli

U Gračanici - prvi doktor nauka

Na Rudarsko-geološkom fakultetu Univerziteta u Tuzli magistar Amir Baraković odbranio je doktorsku disertaciju na temu "Geološke i kvalitativno-kuantitativne karakteristike sirovina Bosne i Herce-

govine za definisanje parametara njihove primjenljivosti u keramičkoj industriji" i time stekao zvanje doktora tehničkih nauka. Barakovićeva doktorska disertacija prva je na tom fakultetu u posljednjih sedam godina, a on je prvi doktor nauka koji je to visoko akademsko zvanje stekao živeći i radeći u Gračanici.

Zaključci do kojih je dr. Baraković došao u svojim istraživanjima, po mišljenju kompetentnih stručnjaka, koje se moglo čuti i tokom odbrane njegove doktorske teze, imat će praktičnu primjenu u keramičkoj i još nekim industrijskim granama naše zemlje, naročito u fazi njihove obnove i revitalizacije.

1. avgust

Spreča ponovo zatrovana

Mještani Donje Lohinje, Donje Orahovice, Gračanice i Stjepan Polja bili su vidno iznenađeni kada su primijetili kako mrtva riba pliva Sprečom. Bio je to pravi šok za ribare, poljoprivrednike i sve ostale žitelje u dolini Spreče, koja se u toku rata bila potpuno "izbistrila" i postala pravi raj za ribolovce.

Neodgovorni vlasnici fabričkih kompleksa iz Tuzle i Lukavca ponovo su u korito Spreče počeli ispuštati otrov. Prvi su se oglasili ribolovci iz Ribolovnog društva "Drijenča" koji su najavili tužbu sudu, zatim SDA Gračanica, potom Skupština Tuzlansko-podrinjskog kantona, te općina Gračanica.

Iako se počinioci ovog zločina prema prirodi znaju, njih je jako teško zvanično identifikovati. Nedostaju kadrovi, oprema i što je najgore - dobra volja.

10. avgust

Spomen-park oslobođiocima Visa

Pošto više nisu mogle podnositi svakodnevnu tiraniju četnika sa Visa, 7.8.1995. godine združene jedinice Armije BiH su u briljantno izvedenoj akciji četnike potisnuli duboko u Trebavu. Vis se jednom

oslobađa, a za sva vremena čuva, poručili su, nakon pobjede, borci Armije BiH.

Druga godišnjica te velike pobjede na najvišoj koti od Ozrena do Save obilježena je brojnim manifestacijama na općini. U Babićima je održana svečana sjednica predstavnika 5 susjednih mjesnih zajednica: Babići, Malešići, Lukavica, Prijeko Brdo i Škahovica, koje su i bile tokom rata najviše izložene svakodnevnim granatiranjima sa Visa. Predstavnici tih mjesnih zajednica jednoglasno su pokrenuli inicijativu da se područje Visa urbanistički zaštiti i proglasi spomen-parkom oslobodilaca Visa.

U sklopu obilježavanja ove značajne godišnjice u neposrednoj blizini Visa izvršena je smotra jednog dijela boraca koji su učestvovali u oslobađanju te kote.

11. avgust

“Put spasa” - čitav pod asfaltom

Velika pobjeda združenih jedinica Armije Bosne i Hercegovine na Visu obilježena je, pored ostalog, i jednom radnom pobjedom. Asfaltirana dionica puta Bukva - Sladna na gračaničkom “putu spasa” prema Srebreniku, u dužini od oko 3 kilometra, konačno je puštena u saobraćaj. Tim povodom u Boriku, nedaleko od Sokola, održan je veličanstven narodni skup kojem je prisustvovalo više od 15 hiljada građana gračaničke i susjednih općina, kao i brojni općinski i kantonalni uglednici.

Izgradnju i rekonstrukciju ovog dijela puta finansirala je općina Gračanica uz pomoć kantonalnog fonda za puteve i njemačke humanitarne organizacije GTZ.

Pošto je presjecanjem vrpce i zvanično otvorio ovu dionicu puta, prisutnima se obratio načelnik općine Gračanica inženjer Hazim Vikalo i, između ostalog, istakao: “Mi smo u toku rata izgradili oko 20 kilometara puteva kojima smo povezali nekoliko naših većih sela međusobno i sa Gračanicom - Miričinu sa Rašljevom, Gornju Lohinju sa Gornjom Orahovicom, Babiće sa Škahovicom, Stjepan Polje sa Lendićima i Gračanicom itd. Podizanje infrastrukture je naš cilj i u miru.”

11. avgust

Gračanica dobila prvoligaša u rukometu

Nakon briljantnih utakmica u kvalifikacijama koje su 9., 10. i 11. avgusta odigrane u Kaknju sa sarajevskim “Željezničarom” i ekipom “Mapeks - Maglaj”, gračanički rukometaši postali su novi članovi Prve rukometne lige Federacije Bosne i Hercegovine.

U toku rata oni su zajedno sa svojim trenerom Bilalom Begovićem loptu zamijenili puškom, da bi se 1993. godine, kad je bilo najteže, uključili u takmičenje u Rukometnoj ligi Tuzlansko-podrinjskog kantona. Sljedeće godine osvojili su četvrto mjesto u Bosni i Hercegovini.

Predsjednik Kluba Besim Duraković uložio je puno truda, zajedno sa ostalim članovima Uprave, na rekonstrukciji poligona malih sportova koji je sada jedan od najljepših u državi, a novi trener Amir Glušac čini sve da gračanički rukometaši osvjetljaju obraz u elitnom društvu.

Svi zajedno sanjaju o sportskoj dvorani bez koje nema razvoja malih sporova u Gračanici.

25. avgust

Esad Kovačević - aferim majstore!

Kao i prošle godine kada je pjesmom “Sevdisanje” osvojio nagradu Stručnog žirija i publike, raspjevani Gračanlija Esad Kovačević i ove godine je trijumfovao na Festivalu narodne pjesme u Lukavcu, koji je održan na prelijepim plažama jezera Modrac.

Čim su čuli prve taktove pjesme “Džanum Fato”, posjetioci Festivala, a bilo ih je preko deset hiljada, bili su sigurni da će jedna od vrijednih nagrada pripasti Kovačeviću, trenuno jednom od najboljih pjevača narodne pjesme mlade generacije u Bosni i Hercegovini.

Ni stručni žiri nije se nimalo dvoumio. Kovačević je, doista, bio najbolji.


31. avgust

Otvorena nova džamija u Donjoj Lohinji

U prisustvu Reis-ul-uleme dr. Mustafe ef. Cerića, generalnog sekretara Rijaseta Islamske zajednice Bosne i Hercegovine Muhameda Salkića, drugih visokih gostiju, te desetak hiljada mještana gračaničke i susjednih općina, u Donjoj Lohinji je

ružuju treba da znaju da mi nećemo odustati od Bosne, jedinstvene, integralne i, naravno, slobodne, u kojoj će svi ljudi moći živjeti," rekao je, obraćajući se prisutnima, između ostalog, dr. Cerić.

Džamiju u Donjoj Lohinji otvorila je hadžihanuma Tifa Ahemtašević, a velike zasluge za njenu izgradnju ima i predsjednik Organizacionog odbora Said Smailbašić.



Otvoranje džamije u Donjoj Lohinji - detalj

otvorena novizgrađena džamija. Izgrađena je neposredno pred rat, ali je njeno otvaranje odgađano zbog ratnih okolnosti. Tokom rata više puta je pogađana artiljerijom ozrenskih četnika, ali su joj oštećenja, zahvaljujući dobrim i vrijednim domaćinima, brzo sanirana.

“Čestitam džematu Donje Lohinje i svima koji su pomogli da se sagradi ova džamija. Ona je dokaz upornosti i istrajnosti naših običnih džematlija, muslimana, koji su znali da prežive sve teškoće i da se odupru svim pritiscima da se džamije ne grade po Bosni i Hercegovini. Tako ni Hasan-mutevelija Bajrić od 1979. godine nije odustajao dok nije sagradio ovu džamiju. Zbog toga naši susjedi koji nas ok-

14. septembar

Kako je glasala Gračanica

Ovogodišnji, opet prvi poslijeratni višestranački izbori (i prošli su bili prvi poslijeratni višestranački) za članove Predsjedništva Bosne i Hercegovine, Predstavnički dom Bosne i Hercegovine, Predstavnički dom Federacije Bosne i Hercegovine i Skupštinu Tuzlansko-podrinjskog kantona - na području općine Gračanica protekli su, generalno gle-

dajući, bez ozbiljnijih incidenata, dostojanstveno, kako i priliči Gračanijama.

U izbornu trku na gračaničkoj općini ušlo je pet političkih stranaka i to: Liberalna stranka (predsjednik Jusuf Nurkić), Liberalno-bošnjačka organizacija (predsjednik Ahmet Šelo), Stranka demokratske akcije (predsjednik Muhamed Ibrahimović), Stranka za Bosnu i Hercegovinu (predsjednik dr. Muhamed Salihbašić) i Socijal-demokratska partija, koja je nastupala u okviru Združene liste (predsjednik Reuf Sokolović).

U predizbornih pedesetak dana svoje promotivne skupove ove stranke, neka sa više, a neka sa manje uspjeha, halabuke i uobičajenog dekora imale su širom općine. U Gračanici kao centru općine gostovali su lideri gotovo svih značajnijih partija iz Tuzle i Sarajeva: akademik Muhamed Filipović, dr. Salih Fočo, Rasim Kadić, dr. Sead Jamakosmanović, Hasan Čengić, dr. Izet Žigić, dr. Zlatko Lagumdžija, Selim Bešliagić, Ivo Komšić, Bogić Bogičević, Izet Hadžić i drugi. Njihovi skupovi bili su uglavnom dobro posjećeni, svi su obećavali bolju i sretniju budućnost ovom narodu. Narod ih je manje-više s pažnjom slušao, a kako je glasao na području općine Gračanica pokazuju sljedeći podaci:

Broj izašlih na glasanje i broj važećih i nevažećih listića

Br.glas.	Za predsj. BiH	Za predst. dom BiH	Za pred.dom Fed. BiH	Za skup. Tuz. pod. kant.
Glasalo	27507	27472	28127	27485
%	100	100	100	100
Važ.list.	26447	27186	27805	27177
%	96,14	98,9	96,44	98,88
Nevaž.l.	1060	286	322	308
%	3,85	1,04	3,55	1,12

Rezultati glasanja za članove Predsjedništva BiH

R.br.	Kandidat	Br.dobijenih glasova	% od br. glasalih
1	Alija Izetbegović	19638	74,25
2	Haris Silajdžić	4397	18,13
3	Sead Avdić	874	3,3
4	Ivo Komšić	604	2,28
5	Ostali	534	2,01

Rezultati parlamentarnih BiH izbora

Stranka	Pred.dom BiH	Pred.dom Fed.BiH	Skupština Tuz. kant.
SDA	18455 67,88%	19170 68,94%	18063 66,46%
S BiH	4198 15,44%	4338 15,60%	4096 15,07%
Zdr.lista	3179 11,73%	3181 11,44%	3531 12,99%
Ostali	1354 4,98%	1116 4%	1487 5,47%

Napomena: procenti u tabeli izkazuju osvojene glasova u odnosu na broj važećih listića.




U Predstavnički dom Federacije sa područja općine Gračanica izabrani su inženjeri Hazim Vikalović i Sead Rešidbegović, kandidati sa liste SDA. Za poslanike u Skupštini Tuzlansko-podrinjskog kantona sa područja općine Gračanica izabrano je pet kandidata i to: Ejub Hodžić, Bahrija Mehurić i Rusmir Djedović, sva trojica sa liste SDA, zatim Reuf Sokolović ispred SDP, a u okviru Združene liste i Azem Ahmetašević sa liste Stranke za Bosnu i Hercegovinu.

Lokalni (općinski) izbori, najavljivani za 23. i 24. novembar, odlukom OSCE i međunarodne zajednice definitivno su odgođeni za proljeće 1997. godine. Razlog: nije obezbijeden povratak izbjeglica svojim kućama, pa time ni regularnost lokalnih izbora.

9. oktobra

“Hem je lijepa, hem je bijela”

Četničke granate, ispaljene 9. oktobra, 1995. godine u 14.05 sati sa Ozrena do temelja su porušile munaru Ahmet-pašine bijele džamije. Slučaj je htio



Munara Ahmet pašine džamije u izgradnji - ljeto 1996.

da posljednja granata ispaljena na Gračanicu u ovom ratu sruši baš taj objekat. Taj vandalski četnički čin nagrdio je lijepo lice Gračanice i bolno odjeknuo u srcima svih žitelja opštine Gračanica. Stoga su bili i razumljivi zahtjevi da se odmah gradi nova munara. Slijedeći te zahtjeve Islamska zajednica je formirala Odbor za izgradnju, koji je odmah otpočeo sa prikupljanjem sredstava i pripremom investiciono-tehničke dokumentacije. Nije prošlo dugo vremena, a prvi kubici betona izliveni su u temelje nove munare koja je za nepunu godinu dana iznikla i višlja i bjelja od one ranije i, evo, na tužnu godišnjicu njenog vandalskog rušenja, ponovo se, hvala bogu, ezan čuje sa Bijele džamije Ahmet pašine...

Uz pomoć gračaničke privrede i brojnih pojedinačnih donacija, sagradili su je vrijedni neimari gračaničkog “Gračevinara” koji su se već afirmisali na ovakvim projektima. Ovo im je do sada osma po redu munara, koju grade svojim rukama.

Munara Ahmet-pašine džamije izgrađena je od armiranog betona, visoka je 39 metara i deset centimetara, par metara više od ranije munare.

Kao da je narod htio obnoviti svoju dušu. Ustvari, ovdje je tako označen početak sveopšte obnove.

10. oktobra

“Gračanički glasnik” ima ko da savjetuje

Nakon svestranih priprema u okviru Redakcije “Glasnika”, osnivač i izdavač ovog časopisa, ITP “Monos” iz Gračanice, sazvaio je prvu konstituirajuću sjednicu Savjeta časopisa, na kojoj su, uvidom u potpisane ugovore o utemeljenju ovog glasila, verifikovani mandati članova Savjeta, izabran predsjednik i zamjenik predsjednika Savjeta “Gračaničkog glasnika”, što je regulisano i članom 5 Odluke o njegovom osnivanju. Podržana je programska koncepcija Časopisa i potvrđeni ugovori o njegovom utemeljenju i načinu finansiranja sa zaključkom da je ovakva publikacija, koja će i dalje izlaziti dva puta godišnje, potrebna Gračanici.

Visoke ocjene kompetentnih kritičara koje su date prvom broju ovog časopisa, koji se mogao samo “dogoditi u Gračanici” snažan su podsticaj i ohrab-

brejke kako Redakciji, tako i osnivaču u njihovim naporima ka konačnoj profilaciji ovog glasila.

Članovi Savjeta "Gračaničkog glasnika" su: Ćudić Hajrudin (predsjednik), Delić Muhibija, Duraković Besim, Hamzić Omer, Kulenović dr. Salih, Mujačić Edin, Sokolović Reuf, Šerbečić Ibrahim, Širbegović Faruk (zamjenik predsjednika) i Vikalo Hazim.

12. oktobra

Talijani sanirali školu u Donjoj Lohinji

Grupa od stotinjak mladih ljudi iz talijanskog grada Padove, jednog od najboljih prijatelja Gračanice tokom rata, kao i mladi iz još nekoliko evropskih zemalja, potpuno su sanirali, ratom opustošenu i gotovo devastiranu zgradu osnovne škole u Donjoj Lohinji. Sa sobom su donijeli i vrijedne donacije, među ostalim 100 hiljada njemačkih maraka, poklon Provincije Padova, koje su utrošili za nabavku građevinskog materijala i ostale potrebe tokom radova na školi. Najbrojniji su bili pripadnici organizacije "Dječaci Padove"

Škola je na simboličan način i uz prisustvo brojnih gostiju iz Padove 12. oktobra predata đacima Lohinje i Pribave (njih 140, od kojih je 60 iz prognaničkih porodica), koji više neće morati pješaćiti do škole u Gračanici. Ovo je jedanaesta škola na području općine koja je adaptirana poslije "izbijanja mira", što je uveliko olakšalo odvijanje vaspitno-obrazovnog procesa i omogućilo bolji kvalitet nastave u osnovnom školstvu na općini.

Na prigodnoj svečanosti u Lohinji predsjednik Savjeta te mjesne zajednice Merced Šestan zahvalio se svim Padovanima, dokazanim prijateljima općine Gračanica, a posebno Lučiji Zanarella, koja je na školi otkrila spomen-ploču u znak trajnog prijateljstva između Padove i Gračanice i Franku Sinigaliju koji je na simboličan način, pritiskom na školsko zvono označio školu otvorenom. Riječi zahvalnosti upućene su i Humanitarnoj organizaciji "Suncokret" i brojnim humanitarcima-volonterima Padove koji su pomagali Gračanici, kako reče općinski načelnik Hazim Vikalo, kad nam je bilo najteže.

14. oktobra

Prva osnovna škola u Gračanici: više od zlatnog jubileja

Prva osnovna škola u Gračanici (koja je donedavno nosila ime našeg poznatog književnika Hasana Kikića) ove godine nizom prigodnih manifestacija obilježava više nego zlatni jubilej - 110. godišnjicu svog postojanja i rada. Od daleke 1886. godine, kada je ova škola osnovana, počinje istorija modernog školstva na području gračaničke opštine. Obilježavanje ove godišnjice započelo je 14. oktobra 1986. godine svečanom akademijom i zanimljivim kulturno-umjetničkim programom koji su pred preponom salom izveli učenici ove škole.

Svečani referat pročitao je direktor Škole Muhamed Delić Vehto, a potom dodijelio prigodna priznanja i zahvalnice dosadašnjim direktorima, svojim prethodnicima, preduzećima i ustanovama koje su pomagale pri adaptaciji, uređenju i opremanju školske zgrade, koja je, kao i mnoge u Gračanici, pretrpjela znatna ratna oštećenja.

Posbena priznanja dodijeljena su Lejdi Miloški Not, predstavnici Fondacije "Margaret Tačer" iz Engleske i Darinki Habler, predstavnici Crvenog križa Slovenije, koje su izuzetno pomogle da ova škola ponovo primi dake u svoje okrilje i ovaj jubilej dočeka u svom predratnom ruhu. Riječi zahvalnosti uputio im je i načelnik općine Gračanica Hazim Vikalo i ujedno pohvalio sve prosvjetne radnike ove škole za sve ono što su uradili, prenoseći znanja i vaspitavajući naše najmlađe sugrađane u gotovo nemogućim ratnim uslovima.

U znaku obilježavanja 110. godišnjice proteći će cijela školska 1996/97 godina u ovoj školi.

17. oktobra

Kamen temeljac za SOS dječije selo

SOS kinderdorf internacional - nevladina i nepolitička organizacije iz Insbruka, nakon višemesečnih priprema i intenzivnih kontakata sa predstavnicima općine Gračanica, napokon je počela da podiže jedno od dva planirana SOS dječija sela za

Bosnu i Hercegovinu, izgradi u Gračanici. Riječ je o vrlo jakoj nevladinoj i nepolitičkoj organizaciji, potpuno baziranoj na privatnim donacijama, čiji je prevashodan cilj da pruža pomoć siročadi i napuštenoj djeci bez obzira na rasu, nacionalnost i vjeroispovijest i to obezbjeđenjem porodične sredine stalnog doma i čvrste osnove za nezavisan život.

Koncept funkcionisanja SOS dječijeg sela zasniiva se na sistemu više objekata (vrtić, ambulanta, radionica, ulice, trgovi, cvijetnjaci igrališta...) u kojem središnju ulogu zauzima porodična zgrada (u selu ih ima 10 - 15) i u njoj porodica sa 6 - 10 djece. Ovaj koncept u startu razbija hipoteku sirotišta i podrazumijeva najhumanije moguće principe zbrinjavanja djece bez roditelja, čiji je krajnji cilj i plemenita težnja da tu djecu izvede na pravi put onako kako bi to učinili njihovi roditelji da ne nastadaše u ratu ili nestadoše u drugim tragičnim okolnostima.

U prisustvu predstavnika SOS kinderdorf, među kojima uvažene gospođe i gospodina Anand, te brojnih drugih gostiju, 17. oktobra u Gračanici je na prekrasnoj lokaciji Bijela polja iznad Gaja, nakon prigodnog kulturno-umjetničkog programa koji su izveli mališani Dječijeg obdaništa i članovi gračaničkog vokalnog sastava "Arabeske", postavljen kamen temeljac budućeg SOS dječijeg sela, 126. po redu, koliko ih ima širom svijeta. Na prigodnoj svečanosti, upriličenoj tim povodom, prvo su se prisutnima obratili Ramiz Kadić, predstavnik SOS kinderdorfa za Bosnu i Hercegovinu i Sead Krupić, direktor SOS kinderdorfa za Hrvatsku, čovjek koji se najviše anagažovao da SOS kinderdorf "dođe" u Gračanicu.

Pozdravljajući prisutne, općinski načelnik Hazim Vikalo, koji se posebno angažovao na pripremi i realizaciji čitavog ovog projekta, vrijednog preko 4 miliona DM, između ostalog je rekao: "SOS kinderdorf je velika porodica i mi znamo da se njihova aktivnost neće odvijati samo u krugu Dječijeg sela u koje će se smjestiti sedamdesetak sirotana i jetima. Oni će biti dio ovog grada i općine, živjeti i odrastati u našem kulturnom, obrazovnom i sportskom ambijentu, te na taj način podsticati i, uvjereni smo, pomagati nam rješavanje još mnogih problema u oblasti obrazovanja, kulture, sporta, komunalija i infrastrukture u našem gradu i našoj općini."

Potom su prisutni mogli vidjeti zanimljivu ceremoniju početka radova na ovom projektu. Prvo je gospodin Sead Krupić u kamen temeljac uzidao

seharu u kojoj se nalazi povelja, dukat, životopis osnivača i utemeljitelja SOS kinderdorfa Hermana Gmeinera, spisak donatora i isječci iz štampe o gračaničkom SOS selu, a zatim je općinski načelnik Hazim Vikalo otkrio ploču koja će svjedočiti o gradnji naselja.

Prema ugovorima sa izvođačima radova-gračaničkim firmama Holding kompanije Širbegović - "Arhitekt" i GMT - dječije selo treba da bude izgrađeno za 12 mjeseci. Sudeći po kvalitetu izvršenih priprema i refernsama izvođača radova, sa sigurnošću se može očekivati da će ovaj, za Gračanicu, veliki posao biti završen i prije ugovorenog roka.

27. oktobar

Lukavičani na radnom frontu

Nikada u Lukavici, koja se nalazi na krajnjem zapadu općine Gračanica (a i Tuzlansko-podrinjskog kantona) neće potpuno zacijeliti ratne rane. To je selo bilo na prvoj liniji odbrane slobodnih gračaničkih teritorija, najistureniji bastion prema četničkim položajima u blizini Doboja i najveći stradalnik među selima gračaničke općine. Iznjedrilo je šestoricu "Zlatnih ljiljana", odbranilo se i, visoko uzdignutog čela, dočekalo mir...

A u miru, vrijedni Lukavičani krenuše da obnavljaju ono što su porušile četničke granate, da grade ono što je najpotrebnije, složno i sa istim žarom s kojim su i branili svoje selo. Pritekoše im u pomoć humanitarne organizacije, općina, IFOR... U rekordnom roku sanirane su ratne štete na školi, fiskulturnoj dvorani i mjesnoj ambulanti, a doveden je u red i simbolično pušten u saobraćaj put od Lukavice do Klokočnice, kojim se u ovo udaljeno selo stiže sada za dvadesetak minuta.

Povodom završetka svih tih poslova u Lukavici je upriličena skromna svečanost, kojoj su prisustvovali i brojni musafiri iz općine, humanitarnih organizacija, IFORA - da zajedno sa mještanima podijele radost prvih mirnodopskih pobjeda i da ih podrže u njihovim nastojanjima da sebi život učine podnošljivijim i ljepšim, jer ovdje - kao i u mnogim drugim selima gračaničke općine ima još puno posla.

Na redu je, kako rekoše, rješavanje problema pitke vode, popravak saobraćajnica kroz zaseoke...

28. oktobar

Krenuo voz preko miričanskog mosta

Za samo petnaestak dana inženjerci italijanskog, mađarskog i rumunskog bataljona IFOR-a popravili su željeznički most na Spreči - na granici između Miričine i Bosanskog Petrovog Sela koji je bio znatno oštećen još na samom početku rata. Tačno u 13.25 sati krenuo je i prvi voz preko tog mosta - od Miričine prema Bosanskom Petrovom Selu. Prvi putnici u vozu bili su vojnici IFOR-a, nekadašnji željezničari iz Gračanice i znatizeljni novinari. Na prigodnu svečanost koju je tim povodom upriličio IFOR došli su brojni Miričani, dok je iz Bosanskog Petrovog sela bilo prisutno svega pet-šest mještana. Nije došao ni šef željezničke stanice iz Bosanskog Petrovog Sela iako je uredno pozvan.

Nakon popravke miričanskog mosta, željezničkom prugom koja spaja Zagreb, Banjaluku, Doboju, Tuzlu i Zvornik u prvo vrijeme saobraćat će samo vozovi za potrebe IFOR-a, dok će do komercijalne upotrebe i putničkih vozova ovom prugom proteći Sprečom još mnogo vode.

30. oktobra

Novi nazivi ulica

Nakon višemjesečne, na momente žučne i polemične rasprave koja se vodila u tzv. strukturama mjesne zajednice Gračanica, Općinsko vijeće usvojilo je novu Odluku o nazivima ulica. Gotovo sve gračaničke ulice dobile su nove nazive koji su, kako je rečeno, usklađeni sa krupnim historijskim i političkim promjenama na ovim prostorima.

Za razliku od dosadašnje Odluke, po novoj će većina ulica, njih preko pedeset, nositi geografske, topografske ili tradicionalne narodne nazive koji su se, bez obzira ne sve promjene, do današnjih dana održali u našem narodu. Jedan broj ulica obilježen je imenima ličnosti i pojmovima iz naše starije prošlosti kao i iz drugog svjetskog rata, dok je dvadeset ulica ponijelo imena istaknutih boraca i jedinica iz tek minulog rata za državu Bosnu i Hercegovinu.

Mada su predlagači novih naziva ulica možda bili pretjerani čistunci jer su gotovo stopostotno revidirali dosadašnju Odluku - budući da je većina ulica dobila tradicionalne nazive kojima su i do sada nezvanično obilježavane, očekivati je da će se Gračanlije brzo naviknuti na nova imena ulica, a odgovarajuće općinske komunalne službe na potezu su da ih adekvatno i obilježe.



POV
Ahn
Pror
Hazi
"Gra

PRC
Rust
Sred
Grač
Ome
Gosp
sa p
voj..
H. M.
Bibli
O va
Grad
Osm.
Prvi